

Saturday, June 27, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



OIL PALM

Siaha district chuan oil palm thar chhuah chungchangah bung thar kai-in nimin khan district chhunga oil palm thar chhuahte chu hralh tura vailiam a ni.

Oil palm thar hralh chhuah hmasak ber hi Amobyu Vaithie, zero point hmuna kum 2014 a chin tawh Oil Palm rah (FFB) a ni a, Pu R Lalrinawma DAO, Siaha chuan kaihruiin, Project Director, ATMA leh Senior Scientist and Head, KVK Siaha te leh oil palm chingtute'n oil palm rah hralh tur vailiamina hun hi an tel pui a ni. Pu John Lalnunsanga ADAO, Siaha chuan District chhunga National Mission on Edible Oil - Oil Palm hnuaia hmalaknaah kum 2025-2026 chhung khan khaw 7-ah oil palm phun thar hna kalpui niin, kung 17,520 chin mek a nih thu a tarlang a. Pu Timothy Laldailova, Assistant Manager, Patanjali Foods Limited chuan Lawngtlai District, Liapha hmunah oil palm herna khawl an din mek thu leh 2027 February atanga oil palm an her tan tawh tur thu tarlangin International price index hmanga Serchhip, Lunglei, Lawngtlai leh Siaha atanga Oil Palm thar an lei zel tur thu a tarlang bawk.

He huna khuallian Siaha Additional DC Pu Abraham Beirazi Khithie chuan Agriculture & Farmers' Welfare Department leh Partner Company ten Siaha District hmasawn na'na Oil Palm chin an kalpui chu a thlawp thu te, taimakna, tumruhna leh hmasawn tumna rilru pu chung nasa leh zuala Oil Palm ching tura Siaha District loneitute a duh thu sawiin Godrej Agrovet, Bukvannei Kolasib a hralh turin Oil Palm rah quintal 19 a vailiam nghal a ni.



LUNGLEI DEVELOPMENT

Chief Minister Pu Lalduhoma chuan kar hmasa khan SASCI 2026–2027 Part-I aṭanga hna thawh turte thlan fel a nih thu a sawi.

Nimina C. Ṭhuamluaia Mualah Lunglei HPC Cup 2026 hmawr bawkna hun hmanpuina-ah he thu hi sawiin Chief Minister chuan chhim lam hmasawna tur hna hrang hrang – Lunglei District-ah Lunglei AOC (Ramthar Veng) aṭanga Lunglawn Three Gate inkar kawng siam ṭhatna tur cheng nuai 377, Lunglei Venghluna Multipurpose Building sakna tur cheng nuai 571, Phairuankai a Agriculture Link Road laihna tur cheng nuai 265 te chu thlan fel a ni tawh niin a sawi a. Hei bakah hian Sawmngai aṭanga Nisapui inkar Economic Road kawng laihna tur cheng nuai 274, Lungsen aṭanga Phairuangchhuah inkar PCC kawng siamna tur cheng nuai 416, Zawlpui aṭanga Khantlang Zau inkar Agriculture Link Road laihna tur cheng nuai 200 leh Dengsur aṭanga Damdiai Zau inkar PCC kawng siamna tur cheng nuai 346; Hnahthial District-a Rotlang East khuaa Agriculture Link Road laihna tur cheng nuai 224, Hnahthiala 132kV Sub-Station bunna tur leh Hnahthial leh Thiltlang inkar 132kV D/C hrui thlunna tur cheng nuai 2,685 leh East Rotlang Water Supply Scheme siamna tur cheng nuai 400; Lawngtlai District-ah Lawngtlaia Lairam Christian Nursing School Hostel Building sakna tur cheng nuai 345 te a tel thu a sawi a ni.

Pu Lalduhoma chuan Urban Infrastructure Development Fund 2025–2026 aṭangin Lunglei tan cheng nuai 525 dah a nih thu sawiin, Lunglei Park chu cheng vaibelchhe 2 senga chei ṭhat tura peih fel a nih tawh thute, Lunglei khawpui chhungah vantlang inthiarna pali cheng nuai 25 ṭheuh senga siam tura peih fel a nih tawh thu leh Lunglei khawpui chhung hmun hrang hranga kea kalna footpath siamna tur cheng nuai 225 ruahman fel a nih tawh thu te a sawi bawk a ni.



PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tum 135-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.



MES NEW ENTRANTS

LPS Vision Production chuan nizan khan Mizoram Engineering Service (MES) tling tharte hnenah lawmpuina a hlan.

MES tling tharte lawmpuina inkhawm hi Zarkawt Community Hall, Aizawl ah huaihawt a ni a, LPS neitute zinga mi Upa Lalrochuanga Pachuau in hunserh a hmang a. Upa Lalnunpuia Hrahseel chuan fuihna thuchah sawiin, MES tling tharte chu Hun bi vawng dik mi, a mamawhtu tana hun bi nei lo va thawk thei, In zir peih mi, thiamna chhuang si lo mi ni tura fuihin, eirukna leh hlemhletna thil tih theihna tur a awm phawt chuan fing leh huaisen taka ‘Aih’ ti ngamtu ni turin a chah a. kohkir leh ngam, dinhmun sang pek nawn chakawm, ngaituahna tak tak senga ram hmangaihna nitin hna thawk mi ni ve turin a chah bawk.

Inkhawmah hian Department of Fisheries leh Irrigation & Water Resources Department Secretary Pu Lalrothanga, leh Mizoram Engineering Service Association President Pu Lalrinzuala Ralte, ten thu an sawi a, MES tling thar aiawhin Pu Zoremsanga’n thu a sawi bakah zirlai ti tha zualte kawmna hun hman tel a ni bawk.

MPSC-in MES (Combined) Examination 2025 a buatsaih result chu kumin May thla khan tih chhuah a ni a, MES atan mi 38 lak thar an ni a. PWD-a thawk tur mi 16, P&E Department-a thawk tur mi 15 leh PHE Department-a thawk tur mi 7 te an ni.



SMART CLASSROOM

Nimin piah khan Synod Higher Secondary School, Multipurpose Hall-ah Smart Classroom Pathian hnena hlanna leh hawnna hun hman a ni.

He hunah hian Rev. Dr. Rosiamliana Tochhawng, Executive Secretary chu khuallian a ni a. Hun hi Pu Lalremchhunga Pachuau, Vice Principal-in a kaihruai a, Pu K. Lallianzuala, Principal-in Technical report a pe a, khuallian Rev. Dr. Rosiamliana Tochhawng chuan thu sawiin Pathian hnenah a hlan a, khuallian chuan khawvel mamawh chhanna Lal Isua a nih thu te, Technology thil reng reng hi tunah hian hman tangkai theihin alo awm ta a, a tangkai thei ang bera hmang tura a duhsak thu a sawi a, he hunah hian Class XII zirlai atangin Trio ngaihthlak a ni bawk. Hall-a hlanna programme hman a nih hnuah Class room-ah hawnna hun hi hman a ni.

He project ‘Smart Class Room’ hi kum 2013 atang daih tawha Synod Education Board hmalakna leh Synod remtihna-in Synod Higher Secondary Science Stream-ah tan a ni a. Heng Hardware leh Software te hi Next Education India Private Ltd. Company te thawhhona thuthlung siama kalpui a ni a. Kum 2024 khan Smart City Project atangin (Trueview) pahnih, a stand leh UPS an lo dawng tawh bawk. Synod Higher Secondary School-ah hian Class Room – Secondary Section-ah 10, Higher Section-ah 12, leh Smart class room 2, a vaiin Room 24 a awm a, chung Class 24-ah chuan Interactive Flat Panel dah vek a ni.

